

Date – 29/08/2025

Time - 07:30 -07:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. **Assembly Speaker Pu Lalbiakzama chuan session zawhna te chhang hma thin turin Dept official te a chah.**
2. **Chief Minister Pu Lalduhoman sawhthing leina man la pek chhuah loh chu pawisa an neih loh vanga pe lo an ni lo a ti.**
3. **Vawiinah Japan khawpui Tokyuo-ah India-Japan Annual Summit vawi 15-na neih a ni dawn.**
4. **Maharastra-a Mumbai khawpui chhung Virar East-a Ningni zana in chhawng li chimah mi 17 aia tlem lo an thi.**

<><><>

SPEAKER

Assembly Speaker Pu Lalbiakzama chuan session zawhna te chhang hma thin turin Dept official te a chah a, tun hi vawi 3 sawina leh house kaltlanga ngenna siam tum 3-na a ni a ti.

Ni 2 awh Mizoram Legislative Assembly Session fur thutkhawm zawhni nimin khan session kharna thu a sawinaah Speaker chuan ngenna hi a siam a ni.

Hemi hma hian Opposition Leader Pu Lalhhandama Ralte chuan sessiona an tih tur list of business chu a hma zan dar 12 ah pawh an la hmu thei lo thin tih sawiin hei hi ngaihmayhawm a tih thu leh Chief Secy kaltlanga a chhang tlai thin dept te pawh zilhhau hial a ngai dawn a ni a ti a, hetiang hian house a ti bawrhbang thei a ni a ti.

Speaker Pu Lalbiakzama kaihhruaia ni 2 awh Assembly fur thutkhawmah ah hian, star question 350 lut zingah zawhna 342 pawm a ni a, House ah zawhna 5 chhan niin chhan hmanloh 35 a awm a ni. Unstarred question ah zawhna 105 lutin zawhna 97 admit ani.

House dawhkanah report 19 dah niin official Resolution pakhat - Mizorama Forest (Conservation) Amendment Act hmanna tur put luh chu House in lungrual takin a pawm a, lehkha pawimawh 13 pharh a ni a, Government Bill 4 lut te pass vek a ni bawk. Bill pass tak te hi, Minister Pu K. Sapdanga'n a put luh - The Mizoram Local Bodies Ombudsman Bill, 2025 : Minister Pu Lalhinglova Hmar bill put luh - The Mizoram Private Placement Agencies (Regulation) (Amendment) Bill, 2025. Minister Pi Lalrinpuui putluh Mizoram Prohibition of Beggary Bill leh Mizoram (Land Revenue) (Amendment) Bill, 2025 te pass a ni.

ASSEMBLY-GINGER

Chief Minister Pu Lalduhoman sawhthing leina man la pek chhuah loh chu pawisa an neih loh vanga pe lo an ni lova, fello chinfel ngai chinfel apiang te hnenah pekchhuah zel a ni a ti.

Nimin Assembly session-a sawhthing chungchang zawhna chhannah House Leader chuan sawhthing man an pek tur hi cheng vbc 95 leh nuai 63 vel a chhut mek a nih thu a sawi a, budget a cheng vbc 110 ah dah a a daihlo zawng chu handholding atangin an pe dawn a, a inpeih apiang an pe zel ang a ti.

ZPM sorkar flagship programme Bana Kaih- Handholding Scheme hnuaiah sawhthing leina tur hi dah tel a ni a ti a, sawhthing ah chauh dah lovin, entrepreneur te, innovator te tan te, special package poh dah vek a ni, a, a tul apiangah an hmang zel dawn a ti.

Sessiona zawhna chhangin Agriculture Minister Pu PC Vanlalruata chuan kum, 2025 feb 20 leh june ni 30 inkar chhung khan sawhthing an lei a, aug ni 16 thlenga report an dawn danin, sorkarin sawhthing alei zawng zawng zat hi qtl nuai 3 sing 4 & 5943 a ni a, sum sen zat hi cheng vbc 70 leh nuai 19 vel niin, a la pung zel a ni a ti.

Sawhthing hi thuang hnihah an lei a, Phase 1 chu feb 20 atanga april 20 chhungin an hawng a, hetah hian kg ah cheng 50 in an lei a, phase 2 chu april 21 atanga-june30 chhung niin company hnenah auction in an hralh a, a leitu company te hian lei zuiin an leina man cheng 50 a tlin lohna zawng support price sorkarin a pe a ni, a ti.

Agriculture Minister chuan Sawhthing leikhawl te hi hralh chhuah lehngal a ni tih sawiin, auction ah a chhang sang ber hnenah a hralh chhuak leh a, sorkarin sawhthing lei nana a sum sen atang tun dinhmunah cheng vbc 17 leh nuai 78 hmuh let a ni a ti a ni.

CHAMPHAI

Ministry of DoNER hnuaia North Eastern Council Joint Secretary Pu Anshuman Dey an nimin khan Champhai-ah DAMC member te leh Kuthnathawktute a kawm.

Pu Dey –a chuan Champhai District DAMC leh loneituten an hmalakna te tha taka an kalpui chu ropui a tih thu a sawi a. Champhai District DAMC leh loneituten harsatna an tawh thin te chu pawu a tih thu sawiin, Central Sawrkarin India hmarchhak lam hawi mai lo a, a hmunah hnathawh a hmalakpui a tum mek a, Mizoramin sawhthing a thar chhuah hi a tha hle a, Mizoram hmel ti langtu pakhat a ni a, India ram mai ni lo khawlvvel huap pawha inphochhuahna tur hmanraw tha tak a nih avangin tun aia nasaa huang zauh leh changtlung zawka hmalak a tul a ni a ti. Joint Secretary chuan kuthathawktute chuan an hmalak zelna turah ruahmanna mumal tak siama Sorkar atanga subsidy tello pawha an hlawtlinpui theih tura ngaituahna senga,

rinawmna leh tumruhna nena hnathawk turin a chah a, an hmalak leh zelna turah duhsakna a hlan a, Mizoram mai nilo India rama loneitute tana entawntlak leh tihmuhtu nih tum turin a chah a ni.

He inkawmna hun zawh hian IIDC Zote, DCSO Secondary Collection Centre, New Champhai, Tlangsam Grape Winery Passion Fruit Processing Unit, Cold Storage Complex New Champhai te a hmunah kalin a enfiah bawk ani.

<><><>

KOLASIB NH MEETING

Vairengte leh a chhehvela Kawngpui thlur li a NHIDCL in a laih mekna hmuna thing kung senghawi leh leivung paih dan chungchang Kolasib DC Pu Robert C. Lalhmangaiha hoin nimin khan Kolasib ah an sawiho.

He thutkhawm ah hian Pu Robert C Lalhmangaiha chuan 4-Lane Kawngpui siam hnathawh mekah Forest Department-te thing kihin Electric Line a tihchhiat thu leh hemi avang hian Vairengte Sub-Division huamchhungah ni 3 chhung Power Supply a awm loh phah chu paw a tih thu a sawi a. Hetiang thil hi a thleng nawn tawh lohna turin fimkhur taka hnathawh a tul thu a sawi. Kolasib DC chuan hmasawmna hna kan thawhna hian mipui nungphung a ti khaihlak tur a ni lova, hei hi Department kaihnawihthe leh NHIDCL leh an hnuaia Contractor-te pawhin an hrechiang tur a ni a ti.

He hunah hian Assistant Conservator of Forests (ACF), Kolasib Pu Jonathan Lalhruaitluanga chuan 4-Lane Kawngpui siam hnathawh kal meka Forest Department hmalakna sawiin Kumin June thla tir atangin thingkung senghawi hna an tan a, Package 3 ah zaa 73 thingkung senghawi hna thawh zawh tawh niin, Package 4 ah zaa 77 zawh a ni a, Package 5 leh 6 ah chuan thingkung sengkawm hna an zo deuh thaw tawh thu a tarlang bawk.

4-Lane Kawngpui sial meka leivung paih chungchangah hian Kolasib DC Pu Robert C. Lalhmangaiha chuan tuihna tichhe lo zawnga hmalak a pawimawh thu NHIDCL leh an hnuaia Contractor-te chu a hrilh a. Kawngpui laihna leivung paih avanga Environment-in a tawrh loh dan tur ngaihtuah reng a tul thu leh Kawngpui laih turin a paltlang khawtlang hrulaitute nen en hova leivung paih dan tur ruahmanna tha zawk siam thin nise a ti a.

Mimal ram a leivung paih chungchangah NHIDCL leh an hnuaia Contractor te chuan ram neitute nen inberawn a, a tul anga hma la tur a rel a ni bawk.

Tun dinhmunah 4-Lane kawngpui siam Project-a Package 3 huamchhung a Vairengte khua leh a chheh velah kawngpui laih hna hi thawh tan a ni tawh a ni.

<><><>

11 YRS OF PMJDY

Sorkar laipui hmalakna hnuaia pawisa ngai lova Bank account hawn theihna, Pradhan Mantri Jan Dhan Yojana hnuaiah Mizoramah mi nuai 4 chuangin account an hawng tawh.

Akashvani Aizawl zawhna chhangin, SBI State level Bankers committee, Co-ordinator SLBC Lalphanglo Tusing chuan PMJDY account chu kum 2015 June ni 30 atangin Mizoramah hawn tan a ni a ti a, Portal-a a lan danin, SBI Mizoramah mipa account nuai 1, sing, 8, sang 7, 665, hmeichhia nuai 2, sing 1, sang 5, 414, a vaiin account nuai 4, sang 3 leh 79 an hawng tawh a ti a, Prime Minister scheme leh Insurance tih theih te vantlang mipuite hnena hrilh hre turin, July ni 1 atanga September ni 30 thleng awh tur, thla 3 daih, 3 months financial inclusion saturation campaign chu ram pum huapa neih mek a ni tih sawiin, Mizoram district 11 ah te pawh neih mek a ni a ti a, campaign neih chhung hian Mizoramah PMJDY account 1,339 an hawn belh tih sawiin, Mizo mipuite chu Sorkar lakpui hmalakna hnuaia Bank account hawn theih tha tak tak, PMJDY, PMJBY, PMSBY, APY, Re-KYC leh Insurance te chu hmang tangkai ve turin a sawm a ni.

Pradhan Mantri Jan Dhan Yojana hi kum 2014 August ni 28 khan Prime Minister Pu Narendra Modi chuan hawngin, kum 11 chhungin ram pumah account vbc 56 hawn a ni tawh a, chung zinga zaa 56 chu hmeichhiate tana hawn niin, hmun 3-a thena hmun 2 chu khawpui pawn, Rural leh Semi Urban a cheng te tana hawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM IN JAPAN

Vawiinah Japan khawpui Tokyuo-ah India-Japan Annual Summit vawi 15-na neih a ni dawn a. He hunah hian Prime Minister Narendra Modia pawh a tel ang.

Nizan khan Prime Minister Narendra Modia hian Japan tlawh tur hian a zinchhuak a Tun tum hi Japan a tlawh vawi 8-na tur a ni a. Annual Summit ah hian Japan Prime Minister Shigeru Ishiba nen Summit an tel dawn a. External Affairs ministry thuchhuah danin ram pahnih hruaitute hian Special Strategic and Global Partnership chungchang an sawidun dawn a. Heng zingah hian ralthuam leh venhimna lamte, sumdawnna leh eibarzawnna, technology leh ngaihtuahna thar hman bakah mipuite inpawhna tura hmalakna te an ngaihtuah ang.

Prime Minister Modia hian Japan ah ni hnih a cham hnuin August ni 31 hian China a pan leh ang.

<><><>

MAHARASTRA

Maharashtra-a Mumbai khawpui chhung Virar East-a Ningni zana in chhawng li chimah mi 17 aia tlem lo an thi a. Mi pakua in hliam an tuar. Chhiatna thlenna hmunah hian NDRF leh fire brigade ten chhanchhuah hna an thawk mek a. President Droupadi leh Prime Minister Narendra Modia te chuan vanduaia thleng mitthi chhungte an tawrhpu thu an sawi a. Chief Minister Devendra Fadnavis chuan mitthi chhungte hnenah cheng nuai 5 theuh zangnadawmna pek a ni ang a ti.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 125-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>